

四庫全書

集部

欽定四庫全書

嚴陵集卷五

宋 董弅 編

詩

經嚴子陵釣臺作四首

龐籍

翠岫臨寒瀨先生老此中  
釣耕輕萬乘要領戒三公  
入宿星躔動歸來世網空  
何人知此意千古激澆風

道閉寧濡足時平亦括囊  
故人登帝世清瀨自吾鄉  
渭

叟非真釣商奴是詐狂先生不可問天外一鸞翔

聞箇狂奴足生平在草萊不榮升帝腹寧自蹋魚臺步  
武中朝下舐舐故國回滄浪重一濯京雒有塵埃

長天杳杳道冥冥一士孤風達至精雲若有心應有著  
魚緣輕餌是輕生何人楚澤三年放此地家灘七里清  
應宿將臣皆列土未將煙水博功名

釣臺

王安石

漢庭來見一羊裘閑默還歸舊釣舟迹似磻溪應有待

世無西伯豈能留崎嶇馮衍才終廢寂寞桓譚道被尤  
回視蒼生終不遇脫身江海更何求

詠嚴子陵

梅堯臣

不顧萬乘主不屈千戶侯手登百金魚身披一羊裘借  
問此何爾心遠忘九州青山東寒灘濺浪驚素鷗以之  
為朋親安慕乘華輶老氏輕璧馬莊生惡犧牛終為蘊  
玉石負古輝嚴丘

讀范桐廬述嚴先生祠堂碑

二蛇志不同相得蓁莽裏一蛇化為龍一蛇化為雉龍飛  
上亨衢雉飛入深水為蜃得自宜潛游江海淡變化雖  
覺殊有道固終始光武與嚴陵其義亦云耳所遇在草  
昧既貴不為起翻然歸富春曾不相助治至今存清芬  
烜赫耀圖史人傳七里灘昔日來釣此灘上水濺濺灘  
下石齒齒其人不可見其事清且美有客乘朱輪裴裒  
想前軌著詞刻之碑復俾存厥祀欲以廉貪夫又以立  
懦士千載名不忘休哉古君子

送正仲都官知睦州

每嗟相逢少常苦離別多行行復止止往往起悲歌古  
來易水上義士有荊軻捐軀思報恩飲恨歌奈何況彼  
兒女懷牽纏如蔓蘿是以世間人鬢髮易番番喜君得  
郡章東歸隨春波灘上嚴子祠繫船聊經過其人當漢  
興富貴不可羅足加天子腹傲去釣于河冬披破羊裘  
夏披破草蓑心中小宇宙尤哂獻玉和我慙賤丈夫豈異  
帶面讎未免為鬼笑誰知懼撝訶安得如君行收迹已

蹉跎空將閒歲月塵埃浪消磨正同三峽賈盡力向盤  
渦

送余少卿知睦州

青山峽裏桐廬郡七里灘頭太守船雲霧未開藏宿鳥  
坡原將近見燒田養茶摘蘂新春後種橘收包小雪前  
民事蕭條官政簡家書時問雲溪邊

送江學士通判睦州

涉淮淮水淺沂溪溪水遲君到桐廬日正值采茶時試

問嚴陵跡今復有誰知

送崔主簿赴睦州清溪

舟輕不畏險逆上子陵灘  
七里峽天翠千重雲木寒  
古祠鳴野鳥亂石激春湍  
正與高懷愜寧歌行路難

寄建德徐元興

才子方為邑千峯對縣門  
靜便琴意古門厭鳥聲喧  
山茗烹仍綠池蓮摘更繁  
訟稀應詠物庭下長蘭蓀

送陳生還烏龍山舊居

蘇舜欽



百丈清溪見戲鱗嚴公祠宇與天鄰此中舊隱君歸去  
笑指人寰一片塵

題子陵釣臺二首

孫沔

舊交為帝不能邀百尺雙臺照暮濤  
逸迹已將山共永清名仍與月爭高  
魯連解難終辭祿龍伯持傾只釣鼇  
列傳古碑言未盡一灘風竹自蕭騷

中興曾作故人看抗節唯憐七里灘  
枯枿卧沙疑野艇叢篁生岸憶長竿  
天邊舊跡星辰動江上餘基水石寒

應笑渭濱周呂望白頭因獵從和鑾

子陵釣臺

王存

嚴公英魄去何之江上空餘舊釣磯古木蒼煙鸛鵒噪  
清波白石鷺鷥飛山中秋色香秔熟壠下朝寒赤鯉肥  
何事夷齊恥周粟一生顛顚首陽薇

題釣臺

馮京

渭水塵空紺葉傾桐江煙老漢風明蚤知賢達窮通意  
閒把漁竿只釣名

釣臺 沈括

漁釣非良業，相期遜姓名。  
太平雖不仕，故舊豈無情。  
七里林泉好，三公位貌輕。  
片飈湍石下，誰不仰先生。

睦州秀亭 錢勰

秀色四時好，探春來此亭。  
花初擁檻發，山晚與雲青。  
得鱸嚴陵瀨，評泉陸羽經。  
歡餘不盡醉，鼓角限重扃。

甘棠樓

樓曲開三面，山重合四圍。  
溪衝朝靄出，飈竝夕陽飛。  
芳

杜供春望晴雲渡拾衣樊川猶未識清興暮忘歸

小杜睦州

詩為多未  
有此也

### 高峯寺

苒苒郡城東穿雲入幾重已窮難上路才到最高峯竹

老龍孫瘦泉甘馬酒濃何當來漱石安隱飽疎慵

漢大官有

酒  
桐馬

### 東館樓

前太守丁公善郎中命予名之按孫權赤烏中使賀

齊討黔歙為新定入晉為遂安郡今此地也會公善  
去郡未揭也宜曰分歙樓

簾影隔朝暎雲低晝尚昏山形分歙翠溪色到江渾日  
盡天垂幕歌餘酒滿尊欄干不堪倚歸思斷鄉魂

玉泉菴

遙派落天潢分崖射壁光山從千古潤江得一源長風  
雨無時作珠璣滿谷量溜澗欲誰辯願借易牙嘗

勉郡庠諸生 趙抃

桐江為守媿顓蒙來喜衣冠好士風勸學重思唐吏部  
教人多謝蜀文翁濟時事業期深得落筆詞章貴不空  
道有未充須自力莫將榮願汨於中

玉泉亭

潺潺朝暮入神清落澗通池遶郡廳亂石長松山十里  
討源須上玉泉亭

題高峯

上石扳松千步勞下窺人物過秋毫嗟誰更向中峯頂

樹塔孤撐碧落高

題甘棠樓

闌干十二壓仙瀛  
占得龍峯作畫屏  
林映遠籠千里月  
湖光寒照一天星  
望來瀑布真霜練  
飛過沙禽半雪翎  
人賞不知春已老  
隔橋依舊柳青青

子陵釣臺

楊傑

高風誰得似先生  
七里溪山當畫屏  
功業不隨東漢祖  
光芒獨應少微星  
蘭臺有史傳名姓  
蓬戶無人問醉醒

若使當時忘故態何由千古羨鴻冥

方干故居

千載富春渚先生家獨存玄英播寰宇丹桂付兒孫  
文正重高節子陵同享尊泊舟明月夜重為弔吟魂

方氏清芬閣

刁約

自別高居二紀餘今朝重到懶踟躕山川勝景依然在  
屈指交親一半無

嚴陵山



一染浮名十五春  
強隨時態役天真  
何年卜築茲山下  
卻笑區區世路人

巡按睦州過烏龍山

元絳

羣山袞袞卷波濤  
舉手天門尺五高  
塵土多年昏病眼  
猶能千里見秋毫

桐廬晚景

向晚西風急扁舟  
下瀨輕颿掛山影  
鼓吹壓潮聲白鳥  
煙中沒斜陽雨外  
明油然五湖意渾  
欲薄功名

宿清溪安樂山

張景修

映窓猶剩雪餘痕  
瓶裏梅花枕上聞  
一椀鐙寒聽夜雨  
半牀氈煖卧春雲  
詩成始覺茶銷睡  
香盡翻嫌酒帶醺  
我是掛冠林下客  
山中安樂合平分

過桐廬邑二首

隱君無姓字何代  
至今存數里山為宅  
兩株桐是孫人煙  
半峯碧溪水帶潮  
渾多少來游客  
茫茫蹋藥根

三載江南客還吳  
東復西潮吞兩溪  
盡雲截衆山齊舟

揖無空日樓臺半上梯桐廬隱君子應笑只留題

釣臺

羊裘東漢客歸隱釣魚灘天子不能屈先生非苟難雲  
藏古石在風激世人寒祠下青青竹何妨把釣竿

清芬閣

嚴子釣臺畔猶聞吟嘯聲榮華付諸弟瀟灑繼先生自  
製茶槍嫩新開酒面清紅塵不拋擺那得白雲名

再至新定有感

岑象求

蜀地吳天各一涯  
去來三紀亦云賒  
烏龍遶郭儼如舊  
白髮滿頭良可嗟  
老矣不堪多感慨  
使乎何處是光華  
周行歷覽猶疑夢  
更問庭櫺幾度花

詠縣廳前古櫺木

三十年前宰一同  
朝朝相對此庭中  
如今翠葉膠枝好  
依舊朱欄戒石東  
潘岳河陽花立盡  
陶潛彭澤柳隨空  
唯君獨負堅剛操  
何異靈椿與夏蟲

方氏故居

邵亢

偶分魚竹到稽山處士林泉一望間歲月自隨流水遠

姓名長與白雲閒鑑中人去荒遺迹

處士鑑湖有別業今不知其處矣

溪口僧來寫舊顏

處士祠堂真像即會稽溪口僧悅躬筆

何日放船訪巖

數吾門高第約躋攀

處士遠孫蒙即僕同知貢舉日教放進士也

題釣臺

馬存

子陵臺下山層層奇峯壯氣橫雲生處士溪邊水泚泚

碧波明月涵天清老松偃蹇傲世色綠竹瀟灑吟風聲

潮頭百仞出海門飄吳擊越如毛輕飛來灘下不敢過

變作平浪歸滄溟

清溪行

陳軒

山色碧於溪扁舟泛落暉水煙颿界破沙鷺驚飛鳥  
嶼隨流曲漁鐙隔岸微月明何處宿待訪子陵磯

憶清溪縣

昔愛清溪景人煙百里間湖居皆釣客郭外盡禪關酒  
市搖青柿公街枕碧山枉教成久別無計約追還

泛清溪

曉煙如練曳平津一擢東風兩岸春  
島鷺沙鷗休戀我  
北堂歸有白頭親

憶雉山書齋

松陰江曲舊齋堂別業歸來各一方  
吟想晚潮煙柳濕  
夢游春檻露花涼  
楊朱路遠空南北  
青帝亭閒自短長  
何日揚鞭訪前景  
竹窓重整讀書牀

桐江夕下

浪催鳴鴈去嘔啞古岸蕭蕭感歲華  
雨脚蒼茫驚斷鴈

煙痕濛密濕棲鴉  
蘆花正落汀飛雪  
楓葉初丹岸有霞  
漸覺望中山色暝  
數星鐙火認漁家

釣臺

吳可幾

君王取天下有人將甲兵  
君王得天下有人相  
昇平我欲介其間  
區區安取成  
莫若歸養  
高高卧  
崑之局  
直使萬乘意  
慕仰飛鴻  
冥身雖隱  
漁釣心  
豈忘朝廷  
常慮天下  
定君王志  
驕盈  
羣臣習見  
聞力諫  
不爾聽  
不有不臣  
者不足回  
其清  
商山四老人  
用是安  
西京  
潛希絕世  
躅



萬一助聖明年當建武日上下咸清寧所懷意不陳終  
焉為客星如何逸民傳乃有狂奴名

過子陵釣臺

葉斐恭

勢利輕捐寄傲中毅然高節凜秋風耕閒釣寂十年迹  
立懦廉貪萬世功須信林間無怨鶴更知天外有冥鴻  
扁舟夜泊靈祠下慨慕先生道不窮

留題釣臺

劉涇

水綠山青人可知不知生氣得之誰釣竿已屬嚴公手

直到玄英解道詩

釣臺

賈青

萬疊層峯夾兩溪  
雨餘清氣却炎暉  
何時學得嚴陵傲  
洗盡塵襟卧釣磯

釣臺

王達

一句能通萬世情  
若非高位即嘉聲  
如何自古留題者  
不悟嚴光解釣名

釣臺

張綬

范蠡功成始遁逃  
淵明五斗便辭勞  
先生二事俱無一  
名與青山萬古高

釣臺

余聞

不誇長揖出宮闈  
不重為漁老釣磯  
最愛清宵銀漢上  
客星時共帝星輝

嚴陵集卷五

欽定四庫全書

集部  
嚴陵集卷七六

詳校官庶吉士臣柳邁祖

助教臣常循覆勘

總校官庶吉士臣朱鈐

校對官編修臣錢樾

謄錄監生臣趙光照

欽定四庫全書

嚴陵集卷六

宋 董弅 編

詩賦

獨樂園釣魚菴

司馬光

吾愛嚴子陵羊裘釣石瀨萬乘雖故人訪求失所在三  
旌豈非貴不足易其介奈何夸毗子斗祿窮百態

次韻葛大卿留題寒光閣

蘇頌

溪凝藍黛合雙川閣在千巖萬壑前漱石我思清病齒  
拂琴誰共聽流泉雲生北嶺橫空白春入東郊一望鮮  
況是江南風物好待君重詠四時天

送江公著知吉州

蘇軾

三吳行盡千山水猶道桐廬更清美豈惟濁世隱狂奴  
時平亦出佳公子初冠惠文讀城旦晚入奉常陪劍履  
方將華省起彈冠忽憶釣臺歸洗耳未應良木棄大匠  
要使名駒試千里奉親官舍當有擇得郡江南差可喜

白粲連檣一萬艘紅妝執樂三千指簿書期會得餘閒

亦念人生行樂耳

二耳義不同  
故得重用

舟過嚴陵灘將謁祠登臺舟人夜解及明已遠至  
桐廬望桐君山寺縹緲可愛遂以小舟游之作二

絕  
蘇轍

扁舟忽草出山來慚愧嚴公舊釣臺舟子未應知此恨  
夢中飛楫定誰催

嚴公釣瀨不容看猶喜桐君有故山多病未須尋藥錄

從今學取衲僧閒

題伯時所畫嚴子陵釣灘

黃庭堅

平生久要劉文叔不肯為渠作三公能令漢家重九鼎  
桐江波上一絲風

絕句

館甥宮裏歎才難當日同朝聽百官先武若知堯舜事  
至今那得子陵灘

釣臺

曹輔



天地何曾著兩雄  
蟄龍飛去有冥鴻  
北辰夜動雙懸象  
南浦秋歸一釣篷  
自昔何人繼高躅  
至今茲地仰清風  
悲涼古意誰能盡  
落日江山醉眼中

千峯榭

呂希純

古郡千山裏  
高臺六月涼  
開軒背城市  
伏檻即林塘  
白佛當平遠  
烏龍插昊蒼  
水風生枕簟  
嵐翠撲衣裳  
欲雨高峯暗  
新晴瀑布長  
稻塍分錦繡  
松嶺奏笙簧  
自昔多賢守  
于今載雅章  
承流叨繼踵  
主諾粗提綱  
夙樂阿蘭

若端居最上方南津有禪侶默坐正相望

紫翠樓

予臨瀟灑郡終日坐樓中樓上闢四門門開面面風南  
榮看馬目北檻對烏龍夕暝瞰堦率朝霞望高峯峯巒  
鬱相望紫翠千萬重中霄若笙簟天籟起長松直疑列  
仙侶駕鶴相過從

趙清獻賞春亭

遺直兼遺愛居今見古人殿中收白簡江上擁朱輪棟

宇才函丈琴尊喜對賓  
遶亭佳木在長與物為春

烏龍寺

秀嶺竒峯接釣臺  
烏龍直北更崔嵬  
萬松合處虛亭敞  
千佛光中梵宇開  
林外瀑泉飛朔雪  
雲間寶藏轉春雷  
攀藤更入西菴路  
一聽支郎語劫灰

承天思范軒

范公當日守江濱  
本是西清獻納臣  
瀟灑溪山瀟灑郡  
太平天子太平民  
棠郊遺愛今仍在  
竹榭高吟迹已陳

還憶開元宋開府相望彷彿見精神

陳尊宿菴

尊宿名方盛菴巖迹未積纖蒲隨日用儋版喚人回臨  
濟親推出雲門手托開于今兩禪派俱自睦州來

靈香閣

昔聞僧道開清淨本求佛談經悟教藏施藥蠲衆疾臨  
嶂起重閣最上構禪室靈香邈可繼壯麗固已軼桐廬  
蕭灑郡茲閣更奇崛峯巒互掩映松竹富蒙密我來一

伏檻紫翠競森出塵襟與羈幘中坐恍已失清風來甚  
遠沖氣久彌逸東軒視蟠桃仙路如仿佛

蕭灑亭

郡因賢守得佳名水態山光會此亭雲外僧歸穿竹隴  
日邊鷗下集沙汀浮梁倒影橫雌霓霓寶塔張鐙疊萬星  
不獨班春行田野重緣香火叩禪扃

高峯巷

予嘗登高峯近瞰碧溪隴老松如卧龍夾道忽騰翥危

梯過百折直下看雲雨善導有遺蹤十佛從口吐歲久  
缺其三塵埃誰復數佛壽儻能續佛像諒可補遶山行  
道迹會轉坦無阻中休有磐石蔽日多林莽安得德山  
流來為此峯主結茅孤頂上端坐訶佛祖

玉泉菴

瀑布巖東轉畫旗拂雲穿石上霏微抱溪修竹通千箇  
夾道喬松過十圍檐外一潭泓翠碧窓間萬斛濺珠璣  
使君不用笙歌擁漱玉聲中岸幘歸

江氏園

北渚南津路不遙，鳴騶喜過定川橋。  
竹間水榭涵虛碧，林外山堂對沈寥。  
地占上游真爽塏，門通禪苑離塵囂。  
游人未歎羣芳歇，石磴杉松正後凋。

民表圓同菴

翠竹菴前久不疑，雨花巖畔更忘機。  
何人得似江居士，在定時多出定稀。

定川門

江如丁字湊城隈，長畏蛟龍鼓浪來。  
門表奠川聊致禱，職當求瘼愧非才。  
兩灘漲定沙痕白，七里山晴霧雨開。  
放出庾家樓上月，却留賓從少裴裒。

王氏亭池

城外溪山知幾重，獨憐池館占城中。  
亭花不動波瀾細，逕石相連島嶼通。  
牀下繫船同醉傅，尊前垂釣似仙翁。  
王家最數烏衣巷，莫廢江南舊士風。

朱氏園



十里游山興盡回  
重留車騎款郊扉  
中橋駕石臨清港  
危榭開軒挹翠微  
夾道松風吹酒面  
滿庭花氣襲人衣  
殷勤更謝華亭鶴  
引吭高聲送我歸

和江民表韻

陳瓘

傅老東山水上浮  
玄沙六月雪重裘  
舊來消息今何在  
千里桐江月滿樓

合江亭上

楊時

倚杖鉤簾兩水間  
晴光飛景上彫欄  
颿催畫鷁搏風去

雲吐鉅峯作劒攢平野煙浮迷遠目晚谿潮漲失前灘  
騎鯨一往扶桑近休問人間行路難

登桐君山二首

霜染溪楓葉葉丹翠鱗浮動綠波閒盤盤路轉千峯表  
冉冉雲扶兩港間掠水輕鷗晴自戲凌風高雁暮爭還  
結廬姓字無人會靜對庭陰一解顏

翠崖千尺峙雲高樓殿翬飛壓巨濤檻外四峯自連着  
祇應潭下有靈鼈

過七里灘二首

拂雲高雁倚風搏下視平湖萬里寬搔首扁舟又東去  
錢塘江上看波瀾

扁舟東下幾時還一席飛颿挿羽翰回首嚴陵臺上月  
清風千古逼人寒

過清溪渡

天濶銜江雨冥冥上客衣潭清魚可數沙晚雁爭飛川  
谷留雲氣鷓鴣傍釣磯飄零江海客歌側一颿歸

題贈吳國華釣臺

君不見釣璜溪上白髮翁一竿西去追冥鴻田車同載  
非羆熊鷹揚烈氣如飄風又不見羊裘石瀨垂綸叟爽  
槩陵天動星斗萬乘故人親訪求卧對鸞輿忍回首聖  
賢遇合自有時潔身亂倫非所知高風寥寥古已往較  
然得失知者誰君有釣臺臨橘水橘溪不與嚴溪比收  
身欲躡渭老蹤笑撚霜髯照清泚澄潭夜月秋光浮擊  
波短艇沿汀洲長繩巨石不能繫飛颿片席歸蓬丘巨

釣沈餌牽九牛一釣直取靈鰲頭脩鱗擺鬣浪山起雲  
鵬飛翮忽十里蹋雲馮翼上青冥一點孤光厠箕尾

嚴陵釣臺

漢網久陵遲國柄授權室中興得英主威明戒前失三  
公經邦手吏事固精覈功臣欲圖全猶不任以職矧茲  
故人分義等天倫戚卓哉子陵心秉哲因前識投身秦  
名爵豈但枉尋尺萬鍾雖天富樊雉非予匹石瀨清且  
泚蒼崖聳而直揭竿事幽尋釣水鮮可食羊裘御冬溫

衮黼未為益三旌屠羊肆義在不吾易用舍各有趣高  
風亘今昔

題方氏清芬閣

朱彥

干戈唐季風塵中一代文章掃地空先生詩鳴最晚出  
句法未減元和工玉壺藏冰不受垢卜隱宛蹈嚴陵蹤  
至今名字照人目直與山水為無窮我舟南紀坐煩促  
接歲風波仍轉蓬緬懷先生酌溪水梅花如霰落晚風  
清芬築室家有法亦見裔孫白雲翁叔今策得待三接

仲也昔跨御史驄乃翁歸來三十載語笑但覺朱顏紅  
翁不見東飛百勞西飛燕南飛烏鵲北飛鴻人生游宦  
正如此我欲買田歸江東

題嚴子陵釣臺

泊舟釣臺側敬謁嚴子陵碧山如佩環水作鏘然聲定  
知千載後尚復有遺靈長嘯明月下緬懷今古情世利  
濁於酒末俗遭塵冥毫髮不一直戈矛豈相爭先生得  
高蹈萬釣獨可輕持釣偶自適潛魚不吞醒清風在人

耳凜凜見典刑不如臺下水方可濯塵纓

寒光閣

駕舟掠杭越小泊清溪門平生江令尹邀我谿南園丹  
碧氣成霞樓疏何鬱盤江城春事起臘候已向殘的皪  
小梅花暗香媚山樊冰鬢絕可愛青士聯蒼官君家藝  
蘭晚歲久蘭有蓀我生真漫浪嗜好無一存尚作山水  
想十年勞夢魂歷眼滄洲趣茲盟那可寒他年釣竿手  
來傍沈郎灘



題釣臺

江公望

漢柄久顛置神鼎遂移新志士恥驕餌入山如避秦中  
興有世祖仄席在幽人玄纁載安車三反方來賓枕漱  
泉石久不羨北軍綈卧屈萬乘尊咄咄平生親箕顓志  
不奪槐鼎意從申歎息上興去天子不得臣歸隱富春

渚釣外無隱淪高名懸日月清風播松筠至今七里水

不到南海津

南海有  
貪水

至今雙石臺獨與西山鄰古木下

高鳥清漪行素鱗溪氣綠靄靄野蔓青緜緜客星照千

古鄧萬安可倫手捉玉璜去出處各有因玄素久寂寞  
猿鶴叫秋旻

題方氏清芬閣

一室翛然斲翳荒嘯歌曾是傲羲皇春風自逐桐花老  
煖日時聞藥草香修竹幾年薶舊隱新詩到處發潛光  
從今應與嚴家瀨相對清芬一水長

兜率寺鑑光閣三首

高下人家隱亂峯澹雲籠日水浮空朝朝暮暮山容改

總屬虛懷一照中

皎皎長空迴絕塵青山雨後更逢春  
一匳古鑑新磨就誰是光明内外人

風吹宿霧寶匳開滿目春容甚處來  
好值軒轅磨瑩手更無一物隱纖埃

玉泉菴二首

高蓋西來動四鄰青青豐草馬蹄勻  
平田淺水相因足野杏山梨次第春  
偃蹇長松如傲世謹呼好鳥似迎人

脩然偶得棲真地方信浮名即是身

十里五里花無主千山萬山春自忙少年意氣傾都市  
走馬橫來若電光泠泠古寺風吹屋蓋死五陵豪俠場  
黃金散盡身無益獨有泉聲千古長

再題

逸士有高躅故山無世情黃花香靨落白馬楮晴明雲  
作朝昏暝泉流今古聲王孫好歸去芳草又重生

又題玉泉菴三首

僻隄藏亂峯清流蔭修竹短策資遠游斗酒拓近局幽  
草不知名孤花送餘馥采芹蹋青泥捫松憐舊綠寄言  
潁川子沒齒傷跼促為君汨其泥與我濯雙足

落崖碧水交流去隔竹黃鸝相應鳴飛絮落花迎野步  
細風輕煖爽人情

天台大士碧峯頭林鎖檀煙凝不收誰坐胡牀揮玉麈  
一聲清磬晚悠悠

玉泉菴

江公著

風煖客衣輕山行眼乍明人非少年事泉作舊時聲草  
屨春游倦茶甌午睡清不教身自在城郭暮煙生

書靜勝院壁留別父老

蔡肇

青山雲半遮慘淡有離色溪水亦潺湲嗚咽當枕側男  
兒四方志百年一行役山水亦奚悲我自本無得父老  
挽我車灑淚半悽惻使君雖自力慙無理人術舉手謝  
父老意厚難報塞

釣臺賦

張伯玉

山水縈回煙霞次開不見逋客空留釣臺地迴而清風  
不去情傷而往事俱來得魚之處猶聞崎嶇古砌壘土  
之功未沒重疊春苔伊昔子陵貪幽自遂辭光武之好  
爵樂富春之勝地雖無晦迹之勞亦有垂綸之事持竿  
一去長為避世之人疊石九層以盡平生之志爾乃凭  
高易感覽舊多傷塵事與清波不返紅蘋同白芷徒芳  
相逢投餌之時寒流淼淼始及臨川之日遠岫蒼蒼今  
古堪悲躋攀盡趣潮平昔日之岸風動當時之樹石上

少留人間多故游絲亂舉初同觸目之疑野竹隨低忽  
有沈釣之懼迹是人非蕭條晚暉萬里之碧嶂如畫幾  
片之白雲不歸鷺立斜分之浦魚驚半毀之磯盡日而  
風波莫問滿山之松桂相依既而悵望歸心裊裊舊址  
尋通樵之一徑下鳴湍之十里煙深釣處空懷迤邐之  
峯日暮臺前無限潺湲之水比夫燕昭王築而禮士漢  
孝武登以求仙構金玉之畢至遂塵埃之共捐曷若茲  
所成於自然峭壁參雲孕清景而無冬無夏寒潭徹底



浸明月而千年萬年已矣哉幾歷芳時誰依茂躅秋風  
起兮浪白春色來兮水綠唯野鶴與輕鷗自往還於水  
曲

釣臺賦 錢總

治平之初元孟春某之役於新定道出嚴子陵祠下作  
釣臺賦其詞曰造東陽之下流兮歷桐君之舊隱俯清  
瀨之淵回兮仰崇山之數仞即釣臺之故處兮發塵編  
而猶信濯七里之澄灣兮晞千齡之逸軫輶且乎衆

壑兮供百嘉之初萌湛尊壘乎麗澤兮揖明水之至清  
鏤肺肝而刻祝兮以恭弔乎先生曰在昔周衰秦亡兮  
漢氏為政天不厭亂兮炎靈中病翦諸夏之磐宗兮授  
五侯以魁柄肇陽平之曠貴兮資文母之永命混伊旦  
之糠粃兮極昇浞之梟獍俄絰禍於百粵兮內毒痛於  
九州逞焚如之虐燄兮孰可望於彼留逮淵龍之未躍  
兮嘗與世以沈浮繫冥冥之何算兮聊卒歲以優游百  
六究而新族兮奉舊物以歸劉雖緯綬以均慶兮曾故

人之獨不順輟佞以辟禹兮或姑治其幽憂謂高卧其  
已足兮安有待於營求意交友之美初兮慕施止於艮  
背將食土則見臣兮非至高而莫對當駕車之三反兮  
終一言而見意噫巢父之累刻兮豈好大而事懟蓋屈  
已以徇人兮有時遷而禍會孰與夫道雖高而身安兮  
名將顯而迹晦渙聊許以增高兮詎少移於故態此先  
生所以馳騫乎六合之外者也向若凝滯思於舊學兮  
垂餘慕於勲庸體蒲輪之安乘兮懷五兩之青銅彼且

厠予兮立大功之諸將責吏事之三公下馬則鄙陋而  
不足為兮上馬則鞅鞅而不我容設濡足以救世兮將  
助理以赴功則高密贊圖於擁節兮近見褫於龍章新  
息誓亡於馬革兮至死謗於炎荒然後知先生照未然  
之成敗兮識幾至之存亡昭利而不動兮得光武而益  
彰者也又若氛祲方結鯨鯢未戮四海沸騰真人隱伏  
莫高匪山莫幽匪谷苟見誚於木石兮悵同羣於麋鹿  
蔑亢世之高蹤兮昧話言之駭俗雖不得與此臺而竝

傳兮固亦無加損於自足此志士所以洞想兮矧精祠之  
可矚激芳風於積波兮慨靈氣之猶畜惡造端於登高  
兮久裴裒而躑躅

嚴陵集卷六

欽定四庫全書

嚴陵集卷七

宋 董斧 編

雜著碑銘題記

應詒 駱賓王

余以三伏辰行至七里瀨此地即新安江口也有嚴子陵釣磯焉澄潭至清洞徹見底往往有羣魚戲歷歷如  
水行耳人有釣者試取投之或有浮而不顧者或有貪

而輒吞者引竿而舉因以獲焉其始出也乃掉尾揚鬚  
有若恃力而自勉其少退也則鼓鰓濡沫有似屈體而  
求哀嗟乎勢牽於人道窮於我將欲以下坐而歌馮子  
又安能中轍而呼莊周哉余乃祝曰猛獸搏也拘於檻  
牢鷙鳥攫也繫於籠樊素龜靈也被髮河津白龍神也  
挂鱗置網何不泥潛而穴處何故貪餌而吞鉤乎於是  
放之江流盡其生生之理時同行者顧詰余曰夫至人  
之處世也擬迹而後投隱心而後動終始不易其畫悔



客不生其情而吾子沈緇於川登魚於陸烹之可以習  
政術羞之可以助庖厨曩求之將何圖今舍之將何欲  
余笑而應之曰聖人不凝滯於物智士必推移於時知  
幾之謂神含生之謂道殷乙聖也因於夏孔子賢也畏  
於匡且夫明哲之賢尚罹幽夏之患況鱗羽之族能無  
弋釣之累哉故曩吾有心也恐求之不得今吾無心也  
既得之而舍夫求與舍不亦雙美乎烹與羞不亦兩傷  
乎況療飢者半菽可以充腹為政者一言可以興邦亦

奚必因小鮮而後明三異之規勦大命而後冀一殄之  
飽擒而不殺可謂仁乎獲而不饗可謂廉乎且夫垂竿  
而為事者太公之遺術也形坐磻溪之石兆應滋水之  
璜夫如是者將以釣川邪將以釣國邪然後知古善釣  
者其惟太公乎又有妙於此者其惟文王乎夫文王制  
六合為鈎懸西履為餌筮之於清廟投之於巨川一引  
而獲太公再舉而登尚父由此觀之蹲會稽而沈轄者  
飽肆之徒也踞滄海而負鰲者漁父之事也斯竝眇小

者之所習安知丈夫之所為哉

漢高士嚴君釣臺碑銘

梁肅

先生諱光字子陵會稽餘姚人也名聞于漢光武之世  
東觀書實載其事當哀平之後天地既閉先生韜其光  
隱而不見建武反正雲雷既定先生全其道見而不屈  
消息治亂之際卷舒昭曠之域如雲出於山游於天復  
歸於無間不可得而累也則激清風聳高節以遺後世  
先生之道可見于是矣或曰人倫大統莫大乎君臣崇

德致用莫盛乎富貴而子陵以賤為貴以臣傲君二者  
其失於教歟君子曰不然夫賢哲之道一動一靜動而  
用者功濟于當世靜而不用者化光於無窮故許由於  
堯先生於漢皆不易乎世游方之外俾後之人聞清風  
而嚮慕焉蓋運有會而事有行伊呂遇湯武而立大功  
子陵遇世祖而立大名去就不同同歸於道焉歲在大  
梁予涉江自富春而南訪先生遺塵則釣臺尚存焉仰  
聆德風刻頌于石其文曰

季葉浩浩澆風蕩淳先生括囊鳥獸同羣四海既  
平故人為君富貴於我有如浮雲名至禁中告歸  
江濱下視天子上動星文接興肆狂孤竹求仁介  
推山死龔勝蘭焚猗歟先生異乎斯人俯仰世道  
從容屈伸清溪悠悠白石磷磷遺風是仰終古不  
泯

陪遂安封明府游靈巖瀑布記

康仲熊

縣之西有山山之巖有泉勝可知也薄游于茲懿彼幽

絕不俟終日褰裳造焉遂負綠綺岸烏紗屨及於城隅  
杖及於通衢背山郭之縈紆乍緩步以前趨縣君封公聞  
而喜曰興所引也我得無行乎乃命車騎邀嘉客追我  
於楓香之野乘我以驪眉之馬載笑載言遺谷超原於  
是穿窈窕躡嶇嶇緣雲搏壁極乎所聞觀其陽崖劃開  
陰壑旁轉懸水百仞注而成潭萬象奔走以呈形羣峯  
回合而却倚練影挂於層漢雨聲散於長林潺潺然無  
晝夜而息雖天台之飛流蔑以過也吾徒盥於斯鑑於

斯塵心洒然世慮都遣啜香茗以傲睨招清風而詠歌  
足以長道機滌煩想功名軒冕於我為賓矧夫上隱雲  
天下臨佛土巖岫窅藹撲人眉宇禪菴居解虎之僧洞  
窟棲駮鷺之客永言長往其可乎哉封公曰異乎夫子  
之說方今國步未安兵革多故忠臣佐世之日志士嘗  
膽之秋遽欲退閒恐非通論僕曰唯唯幸無重吾過請  
從子而歸回首林蘿謝白雲而去刻彼巖石聊紀盛游  
時大歷十二年暮春上巳之明日也

嚴先生釣臺記

崔儒

易象以天地交乃泰夫交者氣同道濟之謂也同則無  
變濟則兼利雖君臣之殊位品類之異數其義一焉嚴  
子陵與漢世祖可為天地之交矣嚴君處道玄寂超往  
返獨以輔弼為縲紲以寵榮為穢污絕世高蹈歸乎舊  
山斯達人之常域也世祖不以祿位抑之不以褒崇加  
之其來也同寢共體其去也鴻飛雲逝示君臣之遭際  
存天地之易簡道泰氣同交之至也後之人以常情所



不及異而疏之飾而詞之是彫其至樸逕於夷途矣況  
今之交者權利傾弛百無一全知人知己事皆昧絕邈  
想遺塵慨然興悲觀其兩峯相嶽羣木茂植上有平田  
足以力耕下臨清流可以垂釣乃嘉遁之勝境舍此何  
居則呂尚父不應餌魚任公子未必釣鰲世人名之耳  
釣臺之名亦猶是乎行舟輟颿因有斯述將以誠夫偽  
交與貪位者豈直紀事而已哉興元元年夏四月景辰

建

睦州大廳記

李道古

任地列封有國之恒制張官考績王者之大轡故監部  
分刺世官為重秦漢之來也隋新定郡武德四年改為  
睦州嘗析桐廬為嚴州復為東睦州尋併為屬邑領縣  
六建德桐廬清溪分水遂安壽昌幅員一千二百里大  
山經川陵陸畧壘居七十崔蒲斥澤田植之壤居十二  
其餘中田小畝之數一農夫而食十人官或旁詔殘以  
漁利單戶危鄉歲虛籍計肆朝廷難其任也洎于山峻

二江合會之勢龍門疏鑿矣輾轅東扼矣丹巘濶聳遠  
通海水巖險呀豁斗絕鄰部士族豪家望走洞穴刑理  
不直或頓機網故郡其新定州其睦若日親敬大化其  
封也自國家有兵甲之費不實內府經用所入浙右重  
於江淮茲郡重於他郡加以鐵官鹽策盡服其籍調租  
過於太半負息而應征蓋所以天不奪時人無其力也  
前時茲郡多命德賢風化所寢父兄成教君子為之斯  
可一變而至於道也始自永徽仰書名氏森然在列以

識遷授元和七年甲子歲記其錄累代刺史名銜除授年代如後

睦州錄事叅軍廳壁記

皇甫湜

入州門東六曹之聯事所在都其任者子於門西經始之意衆未諭也前刺史李君為政更年大惠一州詔徵始聞而未至也思宜利所遺步覽庭內顧以茲為不厭慮財鳩傭即日即工馮寬顯構相前增葺儼然華就翩然樂遷六縣之駿奔於是乎肅序百胥之執事於是乎

總齊羣官之退食於是乎委蛇矣利不十不變法其斯之謂乎錄事叅軍既荷寵飾有懷章示具以廳壁為記宜異也請泚書之元和八年四月三日記

移城隍廟記

呂述

睦州城隍神廟舊在城內西北隅元和初年刺史鄭膺甫移置於城北門樓上其地舊置州獄及司法官廳開成四年刺史呂述移獄就六司院東南之隙地於廢趾上立新廟堂屋三間五架階高三尺上設鴟尾三面行

廊聯屬東嚮開門門外造廳一間一厦為修容之所五年正月十九日廟成遷神像焉神坐後分畫侍衛於左右壁其門左右畫兵仗屏之南北列木寓馬二階前植松五本門外夾道亦植松三月十六日大備牲牢雜樂率將吏以落之今紀其祝詞於後云禮陳八蜡之名曰祭坊與水庸事也然則城隍命祀本在勤人積厚成陰環茲郡國論功校重冠彼神祇自州城卜遷神位已固訪聞元和首歲移置郡樓下不在田乖鎮寧之義居無

函丈闕鼓舞之容況乎列卒巡城通宵擊柝往來褻慢  
啓閉喧呼既違肅敬之方豈獲幽陰之助述謬膺符守  
親謁儀形睹籩豆之虧廢歎祝史之偪窄雖飾以黼帳  
新其靈衣而居非所安理合改卜崇墉之內廢趾猶存  
遂初新宮式從弘敞丹刻咸畢翬飛有嚴練此吉辰敬  
遷廟貌伏願永安閼邃敷祐生靈使封境無水旱之虞  
牧守成富庶之績敢申崇奉毋媿聰明云開成五年六  
月一日刺史呂述建

馬目山新廟記

睦州主烏龍馬目二山馬目在州西南勢如驚奔拔去  
不得中蓄怪態晏天常陰望之而知其能雲雨也先是  
州之右有潭曰層潭其深無至鱗物宅焉因立廟潭上  
而馬目顧無之每有禱則附而祝曰告于層潭馬目之  
神開成己未歲六月江南大旱述乃致精意于神曰能  
雨則立廟越三日晡時雲氣從山來饋烝牆進空中濤  
喧俄而震雨隨下自是比旬必雨故民有半收八月既



霽述泝江四十里而遠躬擇廟位果有一峯壓江隨水  
蕩搖蕃茂蔽覆淺濃百色周步其下絕無徑斬叢攀樛  
漸得峭脊蛇行而上百數步抵大石根如圭而頂如壺  
側視之有木一本十五榦垂覆三面無地獨其北平可  
居卜室昭昭乎神之告寧也乃依勢取高架為新廟明  
年三月二日戊寅成率將吏以釁之盥于瀑流席于香  
蕪挂豆籩于森疎響笙磬于蕭瑟燎于煙靄瘞于嵌空  
揚颿而下過醺酒祈福信可以畏百衆而雄諸祀也夫


祭山曰庋縣蓋謂或庋或縣置之於山也今述相神之居也本其義矣尚永賚于斯民

刻嚴陵釣臺

羅隱

巖巖而高者嚴子之釣臺也寥寥而不歸者光武之故人也故入之道何如睨蒼蒼以言之尊莫尊於天子賤莫賤於布衣龍爭蛇蟄兮風雨相遺干戈載靡兮悠悠夢思何富貴不易節而窮達無所欺故得脫邯鄲之難破犀象之師造二百年之業繼三尺劍之基者其唯有

始有卒者乎下之世風俗偷薄祿位相尚朝為一旅人  
暮為九品官而親戚骨肉已有差等矣況故人乎嗚呼  
往者不可見來者未可期已而已而



嚴陵集卷七

欽定四庫全書

集部  
嚴陵集卷八  
九

詳校官庶吉士<sub>臣</sub>柳邁祖

助教<sub>臣</sub>常循覆勘

總校官庶吉士<sub>臣</sub>朱 鈐

校對官編修<sub>臣</sub>吳壽昌

謄錄監生<sub>臣</sub>周 鈐

欽定四庫全書

嚴陵集卷八

宋 董弅 編

雜著碑銘題記

睦州大廳記

刀桁

王者列土以崇化諸侯供職以勤民故保乂庶邦而緝  
寧大範然則良二千石所以稱共理之才肇十二州所  
以光無外之德唐虞之秩可紀龔黃之政必陳古今不

渝理道斯著睦州新定郡者天中勝槩浙右輿區環繞  
翠山練傾澄瀨軒后登遐之地南顧連岡嚴陵垂釣之  
臺北由屬邑高風盤礴爽氣裊裊歷代名賢出牧是任  
者蓋多矣按隋書仁壽中以睦而命郡者取其俗阜人  
和內外輯睦之為義也若乃星紀土風之候殖物產賦  
之宜昏明迭運之由廢置從時之理著於史策列在圖  
經此可梗槩而不述也國家以天人合發文軌大同保  
我烝民莫非爾刺以為漢之牧守入為三公則太重重

則無篤固之心唐之郎官黜為五馬則太輕輕則有忽  
略之志所以矯前代隆殺之弊盛當朝欽恤之仁凡百  
屬官乘軺出牧皆以本秩而知郡事繇是政則不悖民  
以之和反軒昊之淳風躋富庶之壽域王猷所洽百世  
可知今知郡事田公以東觀之任榮右史之班察俗去  
苛觀風尚禮下車為政朞月有成隆典允修無文咸秩  
先是郡有正廳記即唐本州刺史李道古所撰以前後  
牧守品名布於鉛槧繇歷既久殘缺則多不改成謀惟



新舊制自唐顯慶二年至聖運太平興國三年之後所  
任刺史知郡咸列于左其有錢氏割據非王命者略而  
不書足以煥前哲之高名俾後來之繼美假文屬吏以  
謹歲時時大宋雍熙二年四月記

嚴先生釣臺碑銘

并序

先生道蘊於身名揚於後與世祖恩禮以旌其德東觀  
信書具載其事然而巢許抗志飲牛欲全其節也夷齊  
餓死扣馬以諫其君也至於逃其國而棄其家違其親

而遠其兄者無足道哉未若先生遇故人而忘大位疾  
夫冒於寵名也游紫闥而隱青山戒夫溺於富貴也勵  
君以攘其私匿勛臣以保其公器教之大者此其志焉  
矧夫上動天文遠歸江漢進無苟而退無屈如雲之在  
空也動則平而靜則專如鐘之在虞也引釣溪流魚可  
得而榮不可就呂尚蹈厲之征所以媿也放懷林藪巖  
可築而名不可尊傳說舟楫之勞所以媿也矯激不亂  
於大倫耿介無偏於小節千古之下一人可知至今使

遺迹煥然高臺雙峙鄉閭多廉潔之行風俗盡樵釣之  
娛化之無窮道之彌遠與夫祿不及而焚於縣上義欲  
行而投於水濱者不可同日而言也衍嘗讀前史即仰  
遐蹤逮歷宦塗首宰鄉邑登高臺而顧慕瞻舊域以裒  
回縣東南有子陵故城存焉願寘曩懷以揚丕德銘曰

天清地濁日行月運人稟粹靈道斯發奮和光同塵邈  
世無悶猗歟先生布茲大訓以君以臣兼退兼進私寵  
不留公議可振潁陽操微箕山義盡仰之彌高磨而不

磷依依雙臺峨峨千仞白雲悠悠清泚芳潤遺風不渝  
華壤可徇布之樂石永騰令聞

淳化五年歲次甲午正月七日建

修夫子廟堂記

田錫

夫子之道布在六經深於六經者得其時遇其主而用  
之則王道明而萬物受其賜也夫子之廟列在郡縣典  
于郡縣者習其禮潔其誠而祀之則廟貌嚴而諸儒知  
所宗也不然則帝王之道未融鄉大夫棄德背義而朝

廷禮樂似是而非也祭祀之禮不修士庶民淫祀徼福而春秋享奠如存若亡也宜其宮垣間寂草木羅生祠宇荒涼風雨不庇矧浙江之右桐谿之濱建邦于山谷之間居民多水潦之害歸然舊廟密邇通溝當子城東南之隅在故壘閨閣之下藩籬踈壞固無數仞之高堂廡湫隘且非兩楹之制水至則几筵斯沒水落則塑像其積不堪庠陋之憂安仰高明之祀加以俗巫交惑徼求木偶之靈風教未還奔走金人之福建乎祀先聖享

先師食祿者忽略而不知為儒者流蕩而忘返錫以東  
嶽待封之歲移殿是邦北戎薄伐之年議遷此廟人來  
獻地影亦庀徒宮贊溫仲舒僉謀之護戎張元吉輔成  
之督郵丘直方經營之七月某日興役也八月上丁釋  
奠也廟無祭器拜章以請之郡無經書上言以求之誌  
素王之神祠成斯文也列門人之遺像題舊贊也翼翼  
諸廡不浹日而成悽悽衆心不俟募而至惜乎鄉飲酒  
之禮久廢人不知尊卑黨有序之學久廢人不識廡恥

列郡無軒縣之樂祭不足觀在笥非袞冕之衣禮不足  
取白華南陔之詩寢則無以警不孝不悌之心類宮齒  
冑之儀亡則無以訓為臣為子之學然廟不立則釋奠  
無所就禮不備則釋菜無所觀是以築為儒宮修其祀  
事請籩豆之古器復牲幣之舊儀祭之者可以交神明  
觀之者可以知勸教神明交則福至勸教明則化行夫  
世之澆淳在乎時禮之用舍由乎上故顏回謂舜亦人  
也孟軻曰回亦人也若然則克念謂之聖罔念謂之狂

必祖述夫子之至仁憲章顏氏之亞聖則文中子亦人也乃知取法於延陵季子問禮於柱史老聃生而知之乎學而知之乎勉人之學讀是碑也遷廟之志見是記也罪言者得於斯知言者得於斯時雍熙三年八月某日記

嚴先生祠堂記

范仲淹

先生漢光武之故人也相尚以道及帝握赤符乘六龍得聖人之時臣妾億兆天下孰加焉惟先生以節高之



既而動星象歸江湖得聖人之清泥塗軒冕天下孰加  
焉惟光武以禮下之在蠱之上九衆方有為而獨不事  
王侯高尚其事先生以之在屯之初九陽德方亨而能  
以貴下賤大得民也光武以之蓋先生之心出乎日月  
之上光武之量包乎天地之外徵先生不能成光武之  
大徵光武豈能遂先生之高哉而使貪夫廉懦夫立是  
有大功於名教也仲淹來守是邦始構堂而奠焉乃復  
其為後者四家以奉祠事又從而歌曰雲山蒼蒼江水

泱泱先生之風山高水長

嚴先生祠堂記篆者名

希深撰子真書中立題伯起立

高平以諫官貶守睦始訪七里瀨立嚴子祠名溪口  
僧悅躬畫古衣冠作嚴子像既成自作記聞丹陽隱  
者邵竦篆有法遂以刻石咨焉竦未嘗篆於人篆此  
獨不讓雖然不肯見其名會子真使來又深於篆者  
重之且恐其不彰使僕名之更自篆石於其石之仄

聖宋景祐四年三月四日

與邵竦先生書

先生邵公足下某今春與張侍御過丹陽約詣先生維舟水邊聞先生歸山所謂其室則邇其人則遠惘然愧薄宦之不高矣暨抵桐廬郡郡有嚴陵釣臺思其人詠其風毅然知肥遁之可尚矣能使貪夫廉懦夫立則是有大功於名教也乃構堂而祠之又為之記聊以辯嚴子之心決千古之疑又念非託之以竒則不足傳於後

世今先生篆高出四海誠能枉神筆於片石則嚴子之風復千百年未泯其高尚之為教也亦大矣哉謹遣郡校奉此恭俟雅命

與晏尚書書

伏自春初至項城因使人回曾草草上謝由潁淮而下越茲重江四月幾望至于桐廬回首大毫忽數千里日思奏記夙乎無階恭惟蕃宣之居鈞體惟寧赫赫之瞻日以增重仲淹臯有餘責尚叨一麾敢不盡心以求疾

苦二浙之俗躁而無剛豪者如虎示之以文弱者如鼠  
存之以仁吞奪之害稍稍而息迺延見諸生以博以約  
非仲淹所能蓋朝家之條教師門之禮訓也又郡之山  
川接于新定誰謂幽遐滿目奇勝衢歙二水合于城隅  
一清一濁發江濁歙江清如濟如河百里而東遂為浙江漁釣  
相望鳬鶩交下有嚴陵之釣石與方干之隱茅又羣峰  
四來翠盈軒窗東北曰烏龍崔嵬如岱西南曰馬目秀  
狀如嵩白雲裊回終日不去巖泉一支潺湲齋中春之

晝秋之夕既清且幽大得隱者之樂唯恐逢恩一日移  
去且有章阮二從事俱富文能琴夙宵為會迭倡交和  
忘其形骸鄭聲之娛斯實未暇往往林僧野客恣然投  
詩其為郡之樂有如此者於君親之恩知己之賜宜何  
報焉今有郡齋歌詩一軸拜獻庶明前言之不誣爾干  
瀆台嚴伏增戰懼尚遠門下伏惟尊察為國自重

題徐常侍篆桐廬縣額

張伯玉

桐廬縣額故左省常侍徐君之篆也篆自秦丞相斯以

名烜天下歷漢魏以降學者亡數至唐中興始得李陽  
冰繼之陽冰後又無人焉至于我朝有徐君自秦到今  
幾一千五百年以篆名家者三焉天下之人言篆者不  
歸于三家則無所祖尚也其為字之寶雄乎其傑藝乎  
始徐君與秣陵刁侯術俱事江南李氏號為名臣後從  
其君歸于我刁初得太祝為桐廬宰徐君以率更令留  
禁中嘗以版素馳京師劬而得之遂揭之于今今之賢  
士大夫道東南者過七里瀨則訪子陵釣臺至桐廬則

必觀徐君之篆其名也豈虛然哉皇祐初吾進士同年  
之子曰彭城劉數以清白長是邑且虞其速朽走奉錢  
抵具區買洞庭石來命工摹刻于署堂之左方請吾言  
以表之夫古之人所以能流聲名美風俗使百世之後  
談娓娓而不絕者皆有以起之也然則異時講桐廬之  
故事者茲可泯乎常侍名鉉字鼎臣廣陵人其儒學節  
義與其摛為世寶者悉書于太史氏茲不復贅五年冬  
十有一月至日吳郡張伯玉題



公堂銘

碑斷闕上文  
止錄見存者

張伯玉

闕  
知人道之大而治亂之不常也故有數學以本焉然  
則學也者總天人之公道乎人君用之以敘羣臣以睦  
四海多士由是以明盛德以毗大業所以張天下至公  
之法用敷于天下無德而名焉又豈徒游是庠登是堂  
觀簠簋聽鏗鏘苟習句讀而已哉銘曰

猗歟公堂邦家之光彌綸奕世景行百王道尊則勝人  
存克揚於穆頌聲與時無疆

睦州學進士登科題名記 趙抃

睦於吳會為裨郡蒼嶂寒瀨齒齒激激風土物色縹渺  
秀巧鍾氣生士翹俊殊甚其學校自文正公基之談經  
治文出乎其間日益盛金部向侯奉慶歷詔更廣堂舍  
學者為便距今業精而上第無虛榜數十年間以今較  
昔得人為三倍夥是以知學之廢興在人士之進退由  
學聖時之明勸也然士之所謂學誠心竭力企古聖賢  
道將至其所未至者也爵位于朝仰首信眉掌握當世

務與奪非是出呼吸間一率以正然後盡臣子忠義之分稱人君敦勉之意脣吻小巧刻章刻句而已乎因萃前後登第者名諸石後來繼焉嘉祐三年戊戌正月元日記

桐廬縣令題名記

倪天隱

三代分土諸侯世國以治斯民曰吾君也其可逃諸侯曰吾民也其可解故其心相孚而化治日起且其地大不過百里歲淹月積其纖悉視民不翅如照矧瓌材瑋

行其能久閉約於其間哉官以器任則士能盡士以鄉  
進則民事悉萬寓以槩國其有忽而不治者邪秦壞先  
王法廢為郡縣其守令丸移而弁易萍轉而蓬飛斯民  
曰彼且去吾善庸何為吾惡庸何傷官者亦曰吾且去  
是非吾民吾安能汨汨自勞苦為故其孚誠不交而卒  
以苟道而曰欲歸民於三代是棄食以求飽也或曰三  
代以侯治漢唐以郡縣治其治一其亂也均適一時之  
宜者不必皆先王之法是大不然夫宿姦巨蠹譬諸蚊

羣陽闢天曉日發旦則聲喪影滅投迹自晦及微陰斂  
昏萬景垂夕則復薨然起嘯噬之患矣賢否相易其昏  
明之交乎抑有大不可者夫郡縣之官凡幾位天下之  
士凡幾人雖有堯舜之明湯文之智不能必察而材諸  
位況紛紛然若百貨之市其屢遷而亟貿也嗚呼生靈  
之伸屈存乎令守取鍛鍊成案取正於法而已是令尤  
為親切於民桐廬故吳分富春縣置屬吳郡隋仁壽始  
用屬睦中間隸屬不常然獄訟賦役便於睦故我宋因

之自錢氏以地歸江南刁公以直道自信出宰是邑自爾以瀕海幽遐不為要壤而風教不能決斯民不識仁義之化亦往往受敝主上至仁始用薦者得補令而間為得人及其敝言上者以私而民之得善令者天也榮君資中文敏而明務以靜治雍容閱案籍得雍熙以來為令者姓氏第而刊之其政之善惡則皆昭然著在人目賢者少不賢者衆則其官人之得失可以鑑而後來者足以自發俾其企善而懲惡亡斯民之病以為石羞

嘉祐七年四月二十三日

睦州新作浮橋記

錢勰

睦古鄣會稽之地據淞江上游當閩粵甌駱黔歙鄱陽  
數道之衝又南出交廣五嶺屬之徼外雖別道循江絕  
湖率多鉅風駭浪漂溺濡滯之患淹久歲日使程賈貲  
度不時至輕裘版輿木楫揭篋由此塗出者常居水道  
之半郡治建德東陽江與歙溪二水合於南東湍悍奔  
激夏輒暴漲雖窮冬涸涸深不可涉故四方之賓客至

者解鞍弛擔倚立露坐而與夫郊野之人抱布囊粟負  
芻荷薪以輸縣官以趨市門者賈組易罇左提右挈以  
返田里以行慶予者纍纍然雜進兩涘引吭頓足以頽  
舟子泝沿上下移晷乃復探懷出金而後得濟烈風驕  
陽其畏僵暍今上治平之初元工部郎中吳興劉公罷  
按察荆湖北道來臨是邦不鄙其民以自暇逸又不為  
赫赫名聲以發取騰踔獎善禁惡一出於愷悌郡遂以  
大治若無可經意故所思者益靜以明而所及者益鉅



以博明年始命行歛溪之陝中直郡城之南隅維舟以

為橋

闕

積功傭千有七百自十二月庚

闕

既成公以其屬落之且曰是急

闕

名宜無所論著惟後之人知鳩

闕

不

侈也無憚其繼焉則滋久而

闕

紀因屬之

於勲愚以謂治古學

闕

斯民者無進退夷

險內外輕重

闕

行吾志者當幸遇而勇為

之惟

闕

蓋若此此其可以刊之金石而

闕

亦有以求其意也治平三年歲

闕

亥會稽錢勰記

闕

靈香閣記

闕

棟宇可以庇風雨臺榭可以遠

闕

肅賓客

山川可以廣眺望此居

闕

為浮圖者之說

則不然曰不闕

闕

大不盛麗不足以來信

嚮故惟

闕

而不已既已闕麗矣而吳越之

闕

丹腹金碧斲磬炫煥至於殫人

闕

而不知止故其山林之峻深郊

闕

之所卜智士之所營非為浮圖

闕

也思允

師居睦州兜率寺之法華院佛學之外兼妙岐黃之術  
人有以疾病告者必盡其技而為之診視凡湯液之所  
餌砭鍼之所加無不如期而應自郡官至于編戶皆稱  
其方技之神良而功施之周普由是車馬之踵門者日  
月相繼而不絕也嘗患其居宇之湫陋賓至無所容遂  
闢故址革而新之又於其傍為閣三間楹桷崇高軒檻

虛明經像嚴於中草石蓄於次

閣

左右布列藥

欄華圃前後相望升其堂則聞芝朮之芬氲游其庭則  
見竹樹之蔭翳雖密邇闐闐而山居巖處之趣備焉考  
成之日太守集賢王微之率賓寮燕飲其上且嘉儲侍  
之美因題其顏曰靈香又賦詩以紀其事繼而作者貳  
車史館劉元忠也觀二詩則院與閣之所有皆可見矣  
後三年余自東陽赴亳社惻郡郵會故人留止過允之  
居因得一游目焉嘗謂桐廬郡溪山之清絕自晉宋以

來文士多稱述之往往載於題詠觀夫城邑間井皆坦  
塗平陸蓋與它州無有異也及登高而望則羣峰回環  
一水縈帶煙雲晦靄朝暮異狀不離指顧而萬景在目  
信乎吳越之佳郡前人之所稱詠不為虛談也而茲閣  
又占一郡之勝處高高下下皆有幽致是為端居造適  
之樂復以甘辛寒溫之上味給人朝夕之求其為利固  
已博矣然則不得與夫競土木而誇閎麗者並也宜乎  
微之元忠歎賞之勤勤如此因書所見以繼二詩之後

云時熙寧五年二月十五日記元祐元年正月十五日  
上石

題嚴先生釣臺

葉恭

漢嚴子陵先生釣臺距桐廬郡城五十里異時人迹罕  
至景祐中文正范公謫守是郡始即臺下構堂以祠先  
生親記其事屬丹陽隱者邵竦篆之刻石今存于郡解  
又命會稽僧悅躬畫古衣冠作先生像于堂中既而過  
祠下望唐處士方雄飛之舊隱周覽徘徊慨想餘風因

復圖其像于堂之東壁自是往來之人鮮不登堂致禮者激貪立懦非曰小補歲月滋久棟宇漸墮上漏側穿像亦故暗且地勝事絕至者喜留名迹而狂易之徒往往及像之面目甚非所以伸虔安靈聳人觀瞻之意迺以僚屬葺堂而完之始為塑像以易繪畫庶幾二高人之清標儼然長存而文正公之遺迹愈遠不泯也元祐元年六月朔日朝請大夫知郡事延平葉棐恭題

敕賜唐二高僧師號記

周邦彥

有二大士顯於有唐在新定城住阿練若咸舉宗教轉  
大法輪曰陳尊宿舍衆居守今賜號兜率以圓通門隨  
彼機緣引接沈冥度無量衆曰善導大師乞食城中處  
高峯山築壇誦佛從者三千開口發聲一一化佛重累  
而出方便善巧修淨土行其故道場皆有遺像而奉事  
弗虔稱號無聞為日久矣元符二年馬公玆來守是邦  
始致崇敬雨暘請禱如響答聲請命於朝乞加褒顯元  
符三年十二月二十四日命下賜尊宿號曰悟空禪師



善導大師為廣道大師明年三月十七日具花幡威儀  
表揭新號為僧伽梨被服二像州民大集巷無居人時  
方靈雨昏翳充塞導迎之初黃霧寥除赫日顯照開闔  
陰陽成於奄忽萬口嗟異得未曾有竊聞真一法中毫  
芒不立況此名謂何所加損然諸聖諦雖譚實相不廢  
假名故雖有漏世界十二類生外道狂解十禪那目業  
果酬答一十八天乃至信住行向地為位五十菩提涅  
槃真如佛性唵摩羅識空如來藏大圓鏡智七種名字

乃至過去無量億數果地正覺莊嚴名稱皆依空建立  
初無實義以假名字引導衆生從佛至佛所不能已則  
二大士加號崇飾義亦復然法身現前亦應攝受而馬  
公夙植德本深達苦空示宰官身而作佛事平等施德  
如物蒙雨與者不有而受者不懷平等施刑如人觸刀  
割者無怒而傷者無怨故能嗣續真風尊禮先覺開發  
勝利為四衆首因緣會遇適當斯時知其由者可無人  
乎年月日錢塘周邦彥記

睦州政平橋記

江公望

太常丞李公勉之為是州也州人安之政之在事者有  
條事之在物者有理簡而不疏文而不害日閱百千牒  
訴應手而解老胥黠吏束手旁觀終莫得其間無終訟  
無留獄郡稱為神明乃歛然猶以民隱為憂州之南有  
大源其源西出於歙合婺水東注于大江夏秋雨淫二  
水鬪湍悍決溢齧高岸拔大木州人患之行道所會前  
值甌閩江南浙東郡邑之民源源而來後莫杭歙通塗

支道躡踵而至適二水之患弛負解橐駢肩重足徯渡者積日依山之民平旦負薪芻裹果木之實趨城市以貿朝晡之膳老穉仰哺至夜暮不得食工部劉公述創為浮梁悲弭斯患出於倉卒未有為脩完之計者故不五十年而毀矣前日之患復見於今日我侯心存之而戚見於顏色州人相謂曰我侯我父母也豈以一浮梁而貽我父母之戚乎各率緡錢付僧守慧等董其事木美工善籌畫有度其表相望眎人若巨擘其廣肩任負

戴雖若連雞乘雁交臂而分馳不相留礙力之所任百斛不墊隱若平地然會費無慮數百萬裒餘金粥田為異時修完之利水之東南有天寧佛祠是祝吾君萬壽之地百官走趨閱月而祝無有險艱此又食土之人所當竭力者也成为以政和四年甲午正月丙寅二十有九日丙午越二月二日我侯率官屬如天寧以落之所以祝吾君也嘗請名於公望竊謂昔周之王使單襄公假道於陳以聘楚火朝覲矣而川不梁歸告王曰陳侯國

必亡王問故對曰天根見而水涸水涸而梁成先王之教也又曰十月成梁夏后氏之令也先王不用財賄而廣德於天下者以此今陳火覲而川無舟梁是廢先王之教令也不亡何待夫川梁之廢興足以知政之得失安可忽哉先王之教寓之於政其令著之在法孟軻謂子產當大國之政區區於一濟人之惠而不知政法之在人也政法不行是無先王之教令也故曰君子平其政行辟人可也政平則教行所以得人心法行則令著

故民聽一而不惑是以此邦之人不出於驅迫歡然致力不一豪取縣官財賄咄嗟而成方來之人厚享我侯之德利非以政平故邪因以名之有觀其名而心惟其義不復為怠偷之政是橋也其利新新曷窮已哉越二日庚戌江公望記

九峯菴記

天下事不獨事始為難卒之又難事之始必於艱難慮患之時故其思深其力勤卒之者常在安逸無事人情

軟熟之後罔不縱弛怠偷鮮克有成僧智日以九峯造  
立卒業具述本初屬余記之余猶能憶少時之游敝屋  
數間入其室間若無人僧醉寢藍縷過午未飯然其山  
峯之羅列者九肩差踵後襟繞帶絕漫不省出入蹤徑  
竹松茂密光景蔽虧窄窄聞摧枯拉朽聲不見其人距  
郡城不數里若在深雲杳靄間靈區奧壤鬼神靳惜不  
以示人居之久難其人也比丘清鑑行高德鉅心地穩  
密州破甲乙以鑑來尸屬久敝之後用力艱用心益精



敏居無何人化其德施手開展締構一新既而以老告  
州復用甲乙以其徒智日代之方艱難慮患之時非鉅  
有才德莫能經畫圖回一代之成績不可不吝其擇甲  
乙非其人安可使也有維有綱既立既張凡百悉蹈繩  
檢世其業雖中才可也況其人精悍多智畫苦身克意  
雖在安逸無事人情軟熟之後毅然有為以卒其業事  
無固必顧得人如何耳蒐之甲乙何負於人哉佛有新  
祠寢飯有堂庖有儲有飭澡有室鐘有架屋纍然坐方

丈其徒烏呼稽首成一保社日之力勤矣哉諸峯著丙  
方者最為秀絕易佛祠值之其盛固日之力然形勝古  
有之政和五年乙未記明年二月甲戌書之

興福院記

凡出於心之所同然者雖夷夏異區貴賤愚智少長之  
不相若寡寡歷數千百年得之者如出一揆心猶虛空  
無毛髮介然空缺處谷滿阮滿牛豕鼻喙滿汙邪甌窰  
滿提攜負汲亦滿終莫有德其賜者蓋終身由之不知

其然也至於灑然若醉醒夢覺當有自來矣何邨建德  
一聚落土風沃美兒田婦桑無有詰窳功不十而利百  
之家饒財桀驁易侮之心生使酒尚氣椎牛博戲攻剽  
為姦馳死地如驚一旦強力惡少革心為善良門閭櫛  
比唯善之為慕西屬天寧佛祠學道者過而問焉東北  
距興福是院廢於保昌至錢氏復興歲在癸亥越甲午  
凡一百五十有三年政和初名額僅存積垣廢趾皆黃  
茅白葦飛走交午敝屋三數間居者無復僧事僧靈皎

出緡錢八百萬施者亦如之建為殿者四能仁僧伽法  
輪十王之像設馬閣二鐘經虞櫝具在殿之陰為演法  
堂次為函丈之室挾以海會香積而門廡泮之凡諸莊  
嚴之具佛比丘諸所受用無一不備人之錢既入而探  
諸囊中如曳九牛之尾八百萬錢出於荒山窮褐者之  
手若非超然感悟越一切拘攣之語與其徒而應之者  
若派水趨下茲有以啟之者焉得於所同然者也由一  
佛祠破慳貪之疾化而為一鄉之善俗由一鄉化而為

一邑之善俗其利曷窮已哉刑毆之不若訖其心使自得之故曰得其一萬事畢斯一也擬心即二焉有問速化之術余告之曰知此而已五年乙未工畢明年八月丁酉江公望記

龍泉院記

龍泉一斛水爾有龍常所託止焉名風霆疾呼起雲霧出肘腋間俄頃嘉雨四洽邑民德其賜作佛祠而庇焉因以龍泉名其祠靈區與宅神物之所託是故山川草

木沃潤而清美代有異人出焉有諸禪者莫知所自其  
高道祕行人亦不知託於龍以福此方之人民以旱告  
甘澤之應若答響焉故歲多穰而民力以饒僧奉齋錢  
忠懿王嘗召演法華文句於竹林寺學者數百雄經鉅  
論博觀泛覽精簡妙義析秋毫矣歸老人漸其餘悔臯  
遷善為一鄉美俗可良四代孫也以禪學住本邑保安  
禪院一日有豕逸於屠刃之下徑趨而跪伏亢而視若  
有所訴而不得言頃之屠者至亟執之哀號可憐以金

易之豢養久擾如善良之人畜無知也能逃死於萬無  
一生之地知所擇也知所擇謂之無知可乎不逃於比  
閭之居而逃於佛祠不逃於它比丘而逃於善知識余  
譬之善良之人不為過矣凡有心者物之偶也有偶則  
爭興唯無心故有心者歸之非有道者不處也師退居  
烏龍邑人挽之而不釋願修故龍泉院以為師處焉裒  
金粥材為殿一區法堂丈室兩廡三間悉具誦閱有經  
製為樞藏以待未暇閱者挽之以行燕居有室以需四

方學者之至仰高明俯清泚宴寂之餘以為興居之適  
又有所謂水閣者在焉成於政和六年丙申三月壬辰  
越丁酉良屬余記其事一斛之水甚微龍託之而神變  
化自如需為膏澤以福於人而佛祠託之以興一豕之  
生固不足道善知所擇而良之道行益著而佛祠託之  
以不廢矢激則遠水激則悍登高而望則見遠順風而  
呼則聲益厲所託者然也至於離人而立獨無所事託  
而良之道吾不得而知也



唯菴記

真悟老禪脫烏龍之縛結茅於其山之西岡以為宴休之地余一日訪之行新田間決決水流可掬可溉入其徑松杉青潤邑邑欲染人衣襪未到三數步小童候門一犬吠嗒嗒應竹作聲自是一山川風物楹楠無藻飾函丈之地唯留一榻牀敷隱厚經行之餘兀然危坐坐久即卧安穩無它苦與余說普通年前事率皆無味之談聽者欲寐余將歸肘余曰為我名此菴余名之曰唯

菴三界唯心萬法唯識釋之者曰唯遮境有識簡心空  
遮有則一心獨照簡空故萬法擬然心法相望非不二  
境余別為之釋曰三界唯心一心唯菴不遮不簡唯境  
唯心聽者霍然失寐掉頭拊髀爵躍而歌曰心唯菴兮  
菴不知但見白雲朝起東山飛菴唯心兮心不住明月  
前溪夜流去朝朝暮暮何時了是中本不同生老一衲  
蒙頭百不為又是青山歌好鳥歌罷真悟老與余相目  
一笑解袂以歸釣臺翁江公望正月十九日記實政和

丁酉歲也

改定川門請僧看經疏文

呂希純

伏以川在境內斯民所依水由地中於性為得粵維新  
定之野適處兩溪之交爰自比年以來頗違潤下之理  
顧茲城闕密控津塗乃涓令辰載揭嘉號集禪關之清  
衆課華藏之祕文並集勝緣庶申善禱謹於南山廣靈  
禪寺請比丘八十一人就定川門轉大方廣佛華嚴  
經一部八十卷行願品一卷並用回向歛發兩港一切

龍神伏願由斯法供諒乃誠祈仗慈力之無邊運神光  
於莫測安安源流之道永却驚瀾保佑室廬之氓俾諧  
寧處伏惟三寶俯賜證明謹疏

請刻石跋

江公望

歛娶二水為睦州之患歲必一至或再至焉壞城決隄  
敗積儲毀廬舍中夕弛備遽及寢戶居民破屋以出其  
不為魚亦幸矣前昔州郡患之終無扞禦之策雨久作  
二水爭行山夾岸如束壅遏不得去故有是患非可與

智力爭也舍人呂公盛德君子愛民出於誠心嘗祭二溪之神其文州人猶能記其彷彿水潦暴行更相遜避若兄弟然詞意惻怛惜乎不傳易門額為定川揭之日復有文請禱於釋氏由定川而後凡二十有一年不復有水患水無情也可告語者神爾神與人不可以言語傳也所可格者誠爾誠不可以虛拘也所以達其誠者斯文在焉訪求累年今始得之願刻諸石以貽將來不墜斯禱惠莫大也政和四年甲午二月初五日江公望

書

嚴陵集卷八

欽定四庫全書

嚴陵集卷九

宋 董弁 編

雜著記疏

重建兜率寺記

羅汝楫

汝楫少時以事過新定子城之北連闥洞開者屋數千楹目其榜則兜率寺也即時游焉祕宇屹然以高繚舍竊然以深支房別院重樓複閣內外整整足為望刹念



此邦薄力向非它州比僧居之陋取蔽風雨而已迺獨  
雄盛如此諒非偶然呼寺僧詢之實唐陳尊宿故居陳  
得法於斷際當時緇素歸重加姓其上以尊宿稱太守  
陳操師事之親受法要事見傳燈錄後世追仰其人相  
與飾此遺武無足怪者及得舊碑讀之乃開元三年台  
州刺史康希誨文其敝輪奐之美反復至數百語詳其  
語往往過於所見則寺之雄盛舊矣不因陳僧而然惟  
是數百年間相繼增葺久而益新亦豈無所自耶紹興

十四年予來莅郡事則寺以焚毀咨興廢之不常為之  
悵惜久之它日與客語偶及此客持三說以起廢為丘  
壝小庵嚴奉有所未至此兜率不可不復者一也疇昔  
寺無恙時徒衆如林計今所存尚復不鮮或至散處市  
肆行業俱墮三尺所禁豈應坐視此兜率不可不復者  
二也寺占形勝之地密鄰州治廢址蕩然無復藩籬居  
人築塚之用取給于此畚鍤日至氣益以索此兜率不  
可不復者三也是三說固不誣屬當巨浸之餘公私屋

室摧圯過半方務悉力營繕何暇它及比就緒得請奉  
祠蘇使君寔來繼予使君頃守嚴有惠愛未幾復臨舊  
治民習其政坐以無事先是兜率之廢天申節齋禱即  
詣烏龍山寺遂為故事使君喟然嘆曰天下州郡皆即  
在城佛館以嚴歸福之洪而吾州獨不爾乃率僚佐走  
郊外亟拜而返權宜可也萬一重修之事少有不虔稽  
察惟艱其何以自安州雖陋顧不能新一刹乎其意殆  
在兜率未遽發會有以林木獻寺者所得類皆環材其

數為多寺僧祖照德淵輩相與經畫興復不籍于寺而  
願預其事者曰惠空僧正慧端實總護之於是分詣大  
姓乞其功用之費遠近響應無不樂施其或無積貲者  
人授一甌使日輟贏餘置其中伺其滿持以歸我錙銖  
積累初若微甚卒至於不可勝計事賴以濟是役也經  
始於十七年冬至十九年正月以訖役告凡為大殿者  
五間山門十有一間兩廡四十有二間為廳事者二侍  
長貳暨官屬之至斜廊六間附焉惟法堂戒壇舊所有

姑因之餘皆煥然一新又僧守越募工為三大像夾侍  
六人如諸方之儀有穆其容瞻者增肅餘力對飾湧壁  
曲盡其妙予居比郡聞寺成意前三說者有以啟之及  
傳使君言則其享上之誠惟恐不至彼三說者抑末也  
常觀天保之詩一章曰俾爾單厚二章曰俾爾戩穀三  
章曰以莫不興以莫不增末章則又取物為況曰如月  
之恒如日之升如南山之壽如松柏之茂古人歸美其  
君者惓惓如此蓋臣子至願在焉不嫌於繁今史君顯

營精廬以申此志而革一時權宜之例茲亦勤矣況復  
誠之所感化荒榛為樑棟易朽壤為瓊甍宜無難者天  
下事其有不可為者哉此寺唐神龍初中宗所建號中  
興寺既而改龍興國朝大中祥符元年始賜今名紹興  
五年宿兵于此一夕遺火蕩盡寔正月八日迨茲十有  
四年矣適使君再至乃始成之豈其成固自有時也使  
君名簡眉山黃門先生之孫才行兼優克世其家父  
侍郎公春秋高益康寧人以為豈弟之報寺成云始辱

以郡人意致書求記義不得辭因為敘其本末而繫之以詩其詞曰

兜率在天惟佛之居招揭美名賁此精廬梵僚翼然金碧爛如妙極人功與天不殊皚皚老師宗門之傑於焉利生機鋒雷掣擁笏擎拳擔囊竭蹶仰止高風千古不滅鋒鏑之腥實穢戶庭災延萬瓦炎埃冥冥載夙告祥維其乞靈無所於寄遠走林垞蘇侯再至念此咨喟事有不度臣子之愧既發其義亦佐其費

緇徒奔走以承其志寶殿有嚴擁以脩廊毫相居中  
巍巍堂堂淨侶咸安勝壤增光老師之奉出于衆香  
鳴占里社靈場再肅以戒以告毋慢毋黷義篤亨亨  
不私其福於萬斯年惟吾皇是祝

均減嚴州丁稅記

唐元宗

嚴依山為郡地狹田少厥土燥瘠勞於播種其民貧窶  
艱於粒食惟陸耕是力惟蠶桑是務惟蒸茶割漆是利  
其父兄子弟役終歲僅得以無饑至於供億公上則



又不堪於煩費浙之俗謂夫貧而嗇者莫嚴若嗇豈其  
欲哉貧累之也聖天子出治以仁視民如子嚴之貧聖  
天子知之矣聖天子不忍其貧而丁稅偏重也慨然念  
之迺下均減之令命大臣以董其事命監司以稽其實  
命守倅以欽其承曾不閱時汔有成議計嚴之丁凡十  
有七萬五千七百四十人減絹凡一萬四千二百九十  
二匹為錢凡四萬七千一百七十緡以沙田蘆場之租  
補大農歲入之數令既下而嚴之民力寬矣昔也人輸

絹率一丈二尺八寸今也七丁率輸絹一匹則昔之取者以其十今之取者以其四嚴之貧民始被無窮之惠猗歟大哉其可謂至德也已矣竊惟君之與民其勢若相曠絕而其實則相資以為養民非君不養也君非民可自養乎穀粟非民孰與食之絲枲非民孰與衣之君之賴乎民者衆則其取於民者宜亦有制矣蓋為富則有不仁之政知予則得為取之方輕則貉重則桀二帝三王之所不由也聖天子躬行二帝三王之政其於斯

民豈一日而忘之哉非能以天下藏天下其能捐利以予民乎非能以民之心為心其能約己以厚下乎令下之日六邑民大和會謳吟鼓舞薰為叶氣自是蠶麥告登穀粟荐稔有年之應緣類而至夫豈偶然也哉先是嚴之習俗苦於丁稅之苛有貧不舉子之患至是不復有聞今歲之春城居之民有一產三男子者與人之誦以為均減丁稅之效其應之速猶影響也故德不修則干戚之舞不可以來遠誠不至則宮商之奏不足以降

神物有相感事有相因自然之理也亢宗不材幸得承  
乏為長吏獲與斯民親被實惠懼無以侈聖天子之賜  
謹以顛末饒諸石垂諸方來且以託名於不朽乾道癸  
巳七月壬辰左朝奉郎權發遣嚴州軍州主管學事兼  
管内勸農事詹亢宗記

重修嚴先生祠堂記

呂祖謙

繇東陽江而下經新定郡五十里得嚴陵瀨蓋東漢嚴  
先生遯世不屈耕釣於富春山後人因以名其瀨也孫

吳析富春為桐廬是瀨亦來屬焉顧野王輿地志曰桐廬縣南有嚴子陵漁釣處石上平可坐十人名為釣壇即今之釣臺也獨兩臺對峙野王所不紀蓋亦猶言之耳明道二年范文正公自右司諫守是邦始築屋祠先生而為之記瀨之旁白雲源乃唐詩人方處士故廬丈正公之游釣臺也嘗絕江訪其遺迹以其像置祠之左丈正公沒郡人思之不忘遂脩食於右坐焉歲祀浸遠此意弗嗣淳熙五年侍郎蕭公出鎮道祠下慨然曰國

家稽用唐武德舊典姓是州為嚴則先生之祠乃名教之首顏圯若是可乎顧急於民瘼未暇也居二年政成化洽以餘力新之時祖謙病廢卧旁郡公以書見諉識其成固辭不可乃復於公曰方王氏移國以光武之大志先生之高氣相與共學夫豈區區呻吟佔畢之末哉漢官威儀既復其舊薄海內外臣子之責塞矣亦何必奮臂於其間哉沒身丘壑固先生之素尚也帝睠焉有懷俾以形旁求於天下得非在庭諸臣奉命承教之不

給未有當帝意者耶三聘而至車駕即日幸其館勉其相助為理所以處先生者不薄矣匪徒屈萬乘之重為故人光寵也先生雖以巢由自命視一世若不足以浼之觀與侯霸尺牘劇切之意見於言外豈於帝猶惓惓未能忘耶浩然而歸使人主有終身瞻望不及之嘆施及後世賓友者俊遂為家法士之聞風興起者堅節正操見危授命項背相望其有益人之國與朝夕獻納雲臺之下者未知其孰多孰少也技必類本韻必報聲使

先生微有意於傲世之名一再傳之後且將為西晉之清虛矣而東京之俗久而益厲名檢之外綜理幹略亦往往高出後世泝而尋其源則建武之高節孰可訾耶至於節義之敝變為亢激特時無建用皇極之君均調消息之耳非造端者之過也後先生且千年文正公來主斯地祀典始舉曠百世而相感者固自不常遇耶今公作牧復大葺祠宇以續前人之緒繼自今以往泝沿下上者歛門而心開升堂而容肅風清樾濯寒泉哦山



高水長之詩致足樂也則公豈專為一邦勸哉祠之前  
則羊裘軒其東則客星閣招隱堂岸江立表以識路繚  
山作亭以待憩或革或因面勢位置各有思致皆受成  
於公以非大指所序故不詳列公名燧字照鄰臨江人  
也主其役者司戶叅軍吳桂七年五月二十二日朝請  
郎直祕閣主管建寧府冲佑觀呂祖謙記朝請郎新渚  
川府路轉運判官虞似良書

重建嚴先生祠堂記

陳公亮

惟得道之士然後能全其高惟樂道之君然後能遂其  
高惟慕道之賢然後能崇其高先生漢光武之故人光  
武既有天下先生獨隱淪漁樵間非傲軒冕也而軒冕  
不能汨非恥功利也而功利不能污玉之潔冰之清後  
世無得而稱焉非得道之士能之乎光武為中興英主  
思故人而訪之既至同寢處無間非不欲寵之以爵位  
厚之以稍廩乃縱其飄然長往終不敢屈非樂道之君  
能之乎先生沒千有餘歲迨我本朝文正范公來興是

邦始即其漁釣地設像建祠為文以表大之歲久棟宇頽圯淳熙庚子太守蕭公燧復加繕治易腐支傾亦既載新未幾守僧不戒于火一夕煨燼公亮始至忽然有動於心方度材會役未及有為明年提點刑獄劉公穎以職事按臨相與嘆息迺與安撫張公杓轉運錢公冲之提舉石公起宗各捐緡錢來助其作其致志卓越寬然與文正相望於百五十年之間非有慕道之誠儔克爾哉于時歲事再登工力頗裕視前之輪奐有加焉曰

三賢堂曰客星閣曰招隱堂曰羊裘軒規模高聳皆踰  
舊制且別創遂隱記隱二區以翼於三賢堂之左右寓  
僧有舍休客有館山巔之壇有亭闢登壇之道而級之  
以石道先有亭以憩視壇稍遠復為亭於中以便游者  
閣之東偏有泉其色如玉亦亭於上榜曰玉泉因筆其  
始末以昭諸賢使者崇高之志云淳熙乙巳十有一月  
朔郡守東陽陳公亮記錫山尤袤書開封趙公孚篆額

重建貢院記

嚴陵為今三輔士風日隆頃當大比應詔者已三千人  
郡舊有貢闈夾于兩寺之間其地湫隘喧囂其棟宇卑  
陋淺窄不惟不足以容殆非朝家嚴科制崇儒禮士之  
意然而郡治瀕溪每遇梅潦之溢則渰浸城市居民奔  
迸遷避往往即官舍佛廟而羣處焉予被命初首訪是  
邦利病咸指水害為急特未有以賓興之所言者比至  
往覘之而氣象蕭索若是其甚大以弗稱為恐竊謂避  
水所急也取賢斂才之宮尤不可緩也得一賢人則天

下被其福得一才士則天下蒙其利始予固欲得高典  
地築室數百間為吾民避水計而名不雅馴與其區區  
惟水是防孰若一新禮闈以振士氣使它時賢能由此  
而出將均其施於四方豈是水之足慮萬一交流暴漲  
有所未免不妨斯民蟻赴而蜂屯庶幾一舉兩得焉謀  
既定會婺守待制洪公邁以名命經筵館于是因以見  
勉於是相陰陽審面勢得地於州序之西偏計其廣袤  
適足以當堂廡之地層巒前列秀氣可挹崇岡後峙旺

勢歸然真角才戰藝之場摘藻振奇之地同僚觀者咸曰  
休哉乃鳩工度材授以規摹政事餘隙必身督之別駕  
二三公既日相從於葦叢中而諸邑令佐又悉能勸相  
率富室之樂教者以助其直亦可以知衆心所鄉矣經  
始于乙巳之孟冬迨丙午王正告成費不病夥役不歎  
勞為屋凡二百間内外小大略備簷楹飛聳梁棟屹立  
望其中則儼如視其傍則翼如井井繩繩端若天造而  
地設焉或謂其地蓋熙豐間貢士所司諫江公公望嘗

於此取科級兵寇後文記不存無以考證豈好事者附會其說以張斯舉乎不然則廢興各有時信非偶然者因以紀於其末淳熙丙午三月一日朝請郎權知軍州兼管内勸農事借紫陳公亮記浚儀趙仵之書

書瑞粟圖下

淳熙十有二禩皇帝將以冬至郊見上帝明年太上聖壽八十預於十二月朔奉上尊號冊寶用正月一日行慶壽禮天地並貺神靈懽喜產祥效祉不知狀名維



時嚴陵賢太上之潛藩今日之輔郡迺生瑞粟錯落原  
隰或一莖而兩穗三穗至于九穗或一穗而兩歧三歧  
至于五歧嘉祥創見目所未覩視周禾之異晦同穎漢  
穀之一莖六穗殆異世而同符豈非以穀粟者常庖之  
所需奉盛之所告厚民生而示至和皆於此乎見之今  
聖主事天事親兩盡其誠而又務農重穀軫于淵衷宜  
其叶氣薰蒸蔚為嘉瑞不于草木而于穀粟不于庶邦  
而于潛藩近甸列歧駢穗昭然以彰厥符不亦休乎公

亮屬守茲土因邦民來告不敢輒隱既圖之聞于朝以  
備國史之登載復鰲石郡齋為一時之光云乙巳十月  
既望知嚴州軍州事陳公亮題

浚西湖記

錢聞詩

澗水瀝水周以都洙水泗水魯以國周三代之盛魯列  
國之尊都焉國焉資水乎曰都國之建士欲秀民欲阜  
不資乎水則二利莫致也烏龍嚴山之主來自東北聚  
氣于予州治按之午向得水山生旺西南方利潞水今

有湖此方歲放生祝聖壽古碣揭于岸湖方四里南一里僅有水餘皆赤地草芄生牛馬豕羊牧焉岸北溪長數百丈久無浚者砂石積平岸夏潦秋霖水漲抹岸漫民屋廬入湖澎湃湖南岸為河長三十丈深濶三丈水注江地理之說謂水山水利生旺來宜西南利衰病去宜東北今西南去無東北去水反陰陽之利始知郡今空乏人多貧少富室士登桂籍赫赫聲名不如舊皆害於水而又不能廣封人祝聖之意聞詩深念之郡乏未

暇理適經常外有輸入者可當浚湖費溪則不給因命  
縣官諭等第家浚溪彼欣然如諭各分丈尺浚繼命郡  
戎官趙善特偕建德宰邵暹尉李唐卿督浚湖役季冬  
農隙以善價募夫一日得數百至集喜甚鋤者鑿者杵  
而築畚而貯者奮千萬指力不怠湖啟得大小石千數  
築澎激岸層石層土柵以木壓大方石其上凡三埂埂  
用工千屹若城壁已絕西南去水而東北無去水路議  
導焉而有父老告昔東城址有大壕注湖水入城洄洑

小湖者三與外溪水會龍津橋揖州治轉東南入江可  
訪也一訪而得壕廣丈餘居民侵塞為屋為圃者半不  
知幾歲月也委曲諭侵塞家皆願如古界還官今湖水  
入東津江凡五里一壕奔淪而下無礙者矣又慮溪砂  
石日積久復為湖害思所以利其後者乃囑監浚湖官  
就畚湖土填堤得屋地百餘丈匠屋為民居三十四募  
賃賃直度日得緡錢委尉日積三歲及千緡餘用以浚  
溪若湖涸亦浚利遠而無窮也夫水行地中猶人血氣

之運經絡經絡塞則壅耗則枯聚而不散則潰行而不  
安則逆今水塞矣無壅乎耗矣無枯乎聚而不散無潰  
乎行而不安無逆乎經絡病人水病國一也湖之四病  
悲去疏積年結伏之脈暢一時清明之氣鱗甲游而樂  
士民喜而泳壽吾皇而福吾土有既乎夫周資水也莪  
菁菁棫杕杕士秀矣千斯倉萬斯箱民阜矣魯資水也  
浴而歸雩而舞亦秀也昌而熾壽而富亦阜也嚴一同  
地周非所擬庶幾馬魯也聞詩哀晚假紱行且去同志

者來繼時魯風盛矣當有頌僖公者然湖以放生名要  
先頌聖壽魯為後天子萬年天子萬壽一頌之再頌之  
又頌之如崧嶽之三呼焉可也淳熙十六年春三月二  
十有四日朝奉大夫權知嚴州軍州兼管內勸農事借  
紫錢聞詩記朝散大夫直顯謨閣新改差知福州軍州  
兼管內勸農事主管福建路安撫司公事馬步軍都  
總管借紫馬大同書

看經襠水患


竊見城外江流正當歛婆二港之衝每歲夏潦秋霖  
江水暴漲浸漫階岸漸沒屋舍居民愁苦深可憐憫  
近閱嚴陵集曩日太守呂公希純嘗命僧八十一員  
轉大方廣佛華嚴經八十卷行願品一卷回向二港  
龍王一切龍神由是二十一年不復有水患呂公希  
純之疏江公公望之跋可驗不誣聞詩痛念斯民之  
苦既聞是事敢不修設再集勝緣云云

右伏以罹水災於今日哀此居民稽故事於昔年妙哉



善果守千里為其上者軫一念其能已乎睹此小邦衝  
夫二港呂刺史之誠既驗江諫議之跋猶存粵惟後人  
要踵前蹟誦真經八十一卷得自龍宮安戶口數千百  
家免沈鼉窟況茲土少而甚瘠而爾民貧而多艱使安  
集而居猶不能處苟漂蕩而散其何以堪敢冀龍神尚  
尊佛教護法不忘於素願救人常切於道援消厥罰之  
常陰俾彝倫之攸敘江平巨浪地剗積沙靡高下之爭  
陵如弟兄之相遜岸無為谷水常行於地中民悉奠居

福自來於天上謹疏



嚴陵集卷九